



**PERSATUAN BANK BANK DALAM MALAYSIA**  
THE ASSOCIATION OF BANKS IN MALAYSIA

Headline: Wanita di Putrajaya paling ramai jadi mangsa sindiket  
Publication/Portal: Kosmo  
Date: 26 March 2019

Language: Malay  
Section: Negara  
Page: 4

## Wanita di Putrajaya paling ramai jadi mangsa sindiket

Oleh MUHAMMAD AYMAN GHAFFA

**PUTRAJAYA** - Setiap bulan, polis daerah ini menerima sekurang-kurangnya 10 laporan kes penipuan melibatkan beberapa sindiket yang kebanyakannya mangsanya adalah pegawai kerajaan wanita dan suri rumah.

Ketua Polis Daerah Putrajaya, Asisten Komisioner Rosly Hassan berkata, antara sindiket yang giat memperdaya golongan itu ialah Macau Scam, Love Scam, pinjaman tidak wujud dan pembelian online.

Katanya, kerugian yang disebabkan penipuan itu mencecah hingga puluhan ribu Ringgit.

“Sebanyak 10 laporan dalam tempoh sebulan bagi saya sangat banyak. Kita berjaya mengesan lokasi kegiatan penipuan ini namun mereka bukan beroperasi di Putrajaya.

“Kebanyakan kes dilaporkan berlaku di sini namun tangkapan sindiket penipuan itu kebanyakannya dilakukan di sekitar Lembah Klang,” katanya ketika ditemui pada majlis Sambutan Peringatan Hari Polis ke-212 di sini semalam.

Tambahnya, kebanyakan penipuan berlaku apabila sindiket menghantar bungkusan atau beg ke rumah dan meminta mangsa membayar wang untuk

kos tertentu.

Menurut Rosly, jenayah seperti itu merupakan antara kes yang tidak terkawal di Putrajaya sekali gus menjadikan indeks jenayah di pusat pentadbiran negara ini sedikit meningkat.

“Bagaimanapun, jenayah fizikal seperti kecurian dan pecah rumah masih terkawal. Kita dapat selesaikan dalam tempoh singkat melalui operasi dan kerjasama penduduk,” katanya.

**ROSLY** (dua dari kiri) memeriksa perbarisan kawalan kehormat pada Sambutan Memperingati Hari Polis ke-212 di Putrajaya semalam.

